

Siunnersuut uunga: Atornerluineq pillugu Inatsisartut Inatsisaat nr. xx xx. xx 2017-imeersoq.

(Peqqissutsimut Naalakkersuisoq)

pillugu

Ilaqutariinnermut Peqqissutsimullu Ataatsimiititaliap

Siunnersuutip aappassaaneerneqarnerani

ISUMALIUTISSIISSUTAA

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Martha Lund Olsen, Siumut, siulittaasoq
Inatsisartunut ilaasortaq Mala Høy Kuko, Atassut, siulittaasup tullia
Inatsisartunut ilaasortaq Jess Svane, Siumut
Inatsisartunut ilaasortaq Laura Tàunâjik, Siumut
Inatsisartunut ilaasortaq Debora Kleist, Inuit Ataqatigiit
Inatsisartunut ilaasortaq Mimi Karlsen, Inuit Ataqatigiit
Inatsisartunut ilaasortaq Kelly Berthelsen, Inuit Ataqatigiit

UPA 2017-ip nalaani ulloq 24. oktober 2017-imi siullermeerinerup kingorna siunnersuut ataatsimiititaliamit sukumiisumik misissorneqarpoq.

Siunnersuutip imarisaa siunertaalu

Imigassamik, ikiaroorartumik aanngaajaarniutinillu allanik, aningaasanoormik tamatumunngalu eqqaanartunik inatsisissatut siunnersuummi allanneqarsimasutut atornerluinerup kingunerisaanik katsorsaanissamut inatsisissatut siunnersuut sammitinneqarpoq.

Innuttaasut ataasiakkaat atornerluinermik ajornartorsiuteqartut akeqanngitsumik katsorsarneqarnissamik neqeroorfigineqarsinnaanerat siunnersuutikkut siunertarineqarpoq.

Atornerluinermut paasisimasaqarfimmik Allorfimmik taaguuteqartussamik pilersitsisoqassaaq, nunatsinnilu kommunini tamani atornerluinermik katsorsaavinnik pilersitsisoqassalluni. Taakku aamma Allorfimmik taaguuteqassapput. Tamatuma saniatigut

nunatsinni atornerluineq pillugu ilisimasanik aqqissuussaasumik katersinissamik qulakkeerinnittussamik atornerluineq pillugu nalunaarsuiffimmik pilersitsisoqassaaq.

Tulliullugu inuit atornerluisunut pingaarutillit atornerluinermik katsorsaasarneq pillugu ilitsersuillutillu katsorsartinnissamik kajumissaarisussat suliffeqarfinni atorneqarsinnaanerannut periarfissamik siunnersuut imaqarpoq.

Siunnersuut ulloq 1. august 2017-imi atuutilersinneqassasoq siunnersuutigineqarpoq.

Inatsisartut siunnersuummik siullermeerinerat

Ulloq 24. april 2017 siunnersuummik siullermeerinnineq ingerlanneqarpoq.

Saqqummiussissut 21. aprilimeersoq Peqqissutsimut Naalakkersuisumit saqqummiunneqarpoq saqqummiussissutaaqqaartorlu 18. marts 2017-imeersoq taamaalilluni taarserneqarluni. Saqqummiussissutip saniatigut Siumukkut, Inuit Ataqatigiit, Demokraatit, Partii Naleqqap aamma Atassutip oqaaseqaataat saqqummiunneqarput.

Ataatsimut isigalugu atornerluineq pillugu inatsisissatut siunnersuut partiinit pitsaasumik tiguneqarpoq. Atornerluinermut katsorsartittarnerup akeerutsinneqarnissaa naammagisimaarneqarpoq. Atornerluineq pillugu paasisimasaqarfimmik Allorfimmik pilersitsisoqarnissaa tapersorsorneqarpoq, taamaaliornikkut atornerluinernut suliniutit atornerluisunillu katsorsaariaatsit ilisimasat katersukkat aallaavigalugit siumut isigisumik iluarsiivigineqartalissammata. Allorfiup siulersuisuisa katitigaanerat oqaaseqarfigineqarpoq. Atornerluinernut pitsaaliuinermi siunnersukkat suliniutit pingaarutaat eqqartorneqarput. Nunatsinni atornerluinerup inuiaqatigiittut inuttullu kingunerisartagai annertuut ernumassutigineqarnerat eqqartorneqarpoq. Nunatsinni atornerluinerup annertunerujussuanut pissutaasut aamma oqaluuserineqarput. Katsorsaanerami aammalu atornerluineq atornerluinermillu katsorsaaneq pillugit pinaveersaartitsiniarluni, siunnersuineramik ilitsersuinermillu suliaqarnermi atornerluisuusimasat akuutinneqarnissaasa pingaaruteqassusia siunnersuutip siullermeerneqarnerani erseqqissarneqarpoq.

Pineqaatissinneqarsimasut atornerluinermik katsorsarneqartarnissaat pillugu ajornartorsiuteqarneq saqqummiussissummi saqqummiunneqarpoq. Ajornartorsiut siunnersuummik siullermeerinerami inaarutaasumik suli paasinarsisinneqanngilaq.

Siunnersuut tassanilu ataasiakkaat taaneqartut sukumiisumik naliliivigineqarnissaat siunertaralugu siunnersuutip Ilaqutariinnermut Peqqissutsimullu Ataatsimiititaliami sukumiinerusumik suliarineqartussanngorlugu innersuunneqarneranik siullermeerineq naammassineqarpoq.

Tusarniaanermi akissutit

Ulloq 4. november 2016-imiit ulloq 10. december 2016 ilanngullugu inatsisissatut siunnersuut tusarniaassutigineqarpoq, tamanna tusarniaanerup sivilissusissaa tusarniaanermullu piffissaliussassaq pillugit najoqqutassianut naapertuuppoq.

Tusarniaanermut akissutit inatsisissatut siunnersuummi nalinginnaasumik nassuiaatini annertuutigut issuaqqissaarneqarsimasut ataatsimiititaliamit maluginiarneqarpoq.

Siunnersuutip tusarniaanerup ingerlanneqarnerani Naalakkersuisut tusarniaanermi nittartagaatigut tamanut saqqummiunneqarnerata saniatigut siunnersuut makkununga tusarniaassutigalugu nassiunneqarpoq:

Namminersorlutik Oqartussani naalakkersuisoqarfiit tamarmik aamma Peqqissutsimut Pitsaaliuinnermullu Aqutsisoqarfik. KANUKOKA, Qaasuitsup Kommunia, Qeqqata Kommunia, Kommuneqarfik Sermersooq, Kommune Kujalleq, MIO, IMAK, IPIS, Isumaginninnermi Naammagittaalliuteqartarfik, Biskopeqarfik, Kalaallit Nunaanni Pinerluttunik Isumaginnittoqarfik, Kalaallit Nunaanni Politiit, NISIIP, AK, SIK, PK, Imigassaq Ikiaroorartullu pillugit Siunnersuisoqatigiit, Pinerluttaaliuinnermut Siunnersuisoqatigiit, Nunatsinni Nakorsaaneqarfik, Nunatsinni Eqqartuussiveqarfik, Nunatta Eqqartuussisuuneqarfia, Naalagaaffiup Sinniisoqarfia aamma Kalaallit Nunaanni Sulisitsisut.

Inatsisissatut siunnersuummut oqaaseqaatit makkununga saqqummiunneqartut soqutigalugit ataatsimiititaliamit misissorneqarput:

Nunatsinni Nakorsaaneqarfik, Kalaallit Nunaanni Sulisitsisut, MIO, SIK, Kalaallit Nunaanni Politiit, Kommuni Kujalleq, KANUKOKA, Imigassaq ikiaroorartorlu pillugit Siunnersuisoqatigiit, Kalaallit Nunaanni Pinerluttunik Isumaginnittoqarfik aamma Kommuneqarfik Sermersooq.

Soqutiginnillutik tusarniaanermut akissuteqarsimasut taakkulu suliarineqarnerat ataatsimiititaliamit qujassutigineqarpoq tusarniaanerlu ataatsimut isigalugu tusaatissatut tiguneqarluni.

Sassartitsineq

Siunnersuummik siullermeerinerup kingorna Pinerluuteqarsimasunut Isumaginnittoqarfiup pisortaa ulloq 24. april 2017-imi ataatsimiititaliamut sassartinneqarpoq. Tamatumani siunertarineqarluni innuttaasunut pineqarsimasunut katsorsaaneermut aningaasartuutit pillugit siunnersuutip § 29-ata siunnersuummi § 3-mi tunngavigineqartunut, tassalu nunatsinni innuttaasut ataasiakkaat atonerluinnermut akeqanngitsumik katsorsartinnissamik neqeroorfiginnittarnermut, sanilliunneqarnerani isummersuutini saqqummiussinissaq.

Apeqqutit

Siunnersuutip ataatsimiititaliamit suliarineqarnerani atugassatut apeqqutit arlaqartut akineqarfigeqqullugit *Peqqissutsimut Naalakkersuisoq* ataatsimiititaliamit marloriarluni qinnuigineqarpoq. Ataatsimiititaliap 28. april aamma 10. maj 2017-imi apeqqutaasa nuutinneri isumaliutissiisummi matumani ilanngussaq **1-itut** aamma **3-tut** ilanngunneqarput *Naalakkersuisullu* akissuteqaatai isumaliutissiisummi matumani ilanngussaq **2-tut** aamma **4-tut** ilanngunneqarlutik.

Siunnersuummik ataatsimiititaliap suliarinninnera

Siunnersuutip qulequtaa ataatsimiititaliamit maluginiarneqarpoq siunnersuutillu imarisaanut naammangitsoq isumaqarluni. Siunnersuummi qulequtaq oqaaseq atornerluineq atorneqartoq pisariaqanngitsumik paatsoorneqarsinnaavoq.

Oqaaseq **atornerluinermut katsorsartinneq** siunnersuutip qulequtaanut ikkunneqassasoq ataatsimiititaliap kissaatigaa. Ataatsimut qulequtassaa ima isikkoqarsinnaavoq: **Atornerluinermut katsorsartinneq atornerluinermullu ilisimasanut qitiusoqarfik pillugit Inatsisartut inatsisaat nr. xx af xx. xx 2017-meersoq.**

Tamatuma kingunerisaanik siunnersuutip qulequtaanut allannguutissatut siunnersuummik Naalakkersuisut saqqummiusseqqullugit ataatsimiititaliap kaammattorneqarput taamaaliornikkut oqaaseq atornerluinermut katsorsartinneq allannguutissatut siunnersuummi qulequttatut nutaatut ilanngunneqarsinnaaqqullugu.

Ataatsimiititaliap siunnersuummik suliaqarnini nunatsinni Pinerlussimasunik Isumaginnittoqarfimmit sassartitsinermik aallartippaa. Siunnersuutip § 29-ata siunnersuummi § 3-mut, *innuttaasunut ataasiakkaanut akeqanngitsumik atornerluinermut katsorsartinnissamut neqerooruteqartarnissamik aalajangersaasumut, sanilliullugu Pinerlussimasunut Isumaginnittoqarfimmik apeqquserneqarpoq. Akerlianik siunnersuummi § 29-imi siunnersuutigineqarpoq innuttaasunik eqqartuunneqarsimasunik, katsorsartinnerup aallartinnerata nalaani isertitsivimmiittunik, atornerluinermik katsorsaannermut aningaasartuutit Kalaallit Nunaanni Pinerluttunik Isumaginnittoqarfimmit akilerneqartassasut.*

§ 29 naapertorlugu pineqaatissinneqarsimasut pineqaatissinneqarsimanertik aallartissimagunikku nunatsinni innuttaasutulli allatut atornerluinermut katsorsartinnissamut peqqinnissaqarfimmit akiliunneqarsinaanngillat.

Nunatsinni innuttaasut allat assigalugit pineqaatissinneqarsimasut akeqanngitsumik atornerluinermut katsorsartissinnaannginnerannut kinaassusersiunngitsumik tunngavilersuut Pinerlussimasunik Isumaginnittoqarfiup ujartorpaa.

Taamaattoqarnera pillugu Peqqissutsimut Naalakkersuisoq ataatsimiititaliamit aperineqarpoq, tak apeqqutit 1-5 aammalu taakkununga akissutit isumaliutissiisummut matumunnga **ilangussaq 1-itut aamma 2-tut ilangunneqartut.**

Akissutigineqartumi akissuteqaammilu allassimasut naapertorlugit siunnersuummi § 29-mut allannguutissatut siunnersuummik pisariaqartitsisoqartoq ataatsimiititaliamit paasineqarpoq.

Pineqaatissinneqarsimasunut ajornartorsiut immikkut ittuuvoq isumagineqartussa, tassami pineqaatissinneqarsimasoq nunatsinni Pinerluuteqarsimasunik Isumaginnittoqarfimmit suli nunatsinnit tiguneqarsimanngitsumit taamaalillunilu suli Naalagaaffiup ataani inissisimasumit isumagineqartussaavoq.

Siunnersuummi § 3 naapertorlugu nunatsinni innuttaasut akeqanngitsumik atorneerluinermut katsorsarneqarsinnaanerannik tunngavimmut tamanna sanilliunneqassaaq. Tunngavik ataatsimiititaliamit tapersorneqartoq, tamatumali peqatigisaanik aalajangiuisimaneqartariaqarpoq innuttaasunut akuulersitseqqinniarnermi tunngaviup attatiinnarneqarnissaanut Pinerlussimasunik Isumaginnittoqarfik pisussaaffeqarmat matumani ilangullugu pineqaatissinneqarsimasunut atorneerluinermut katsorsaansamik neqerooruteqarsinnaaneq.

Pineqaatissinneqarsimasut inissinneqarsimanerminni assigiinngitsunik killilersuutitik atugassaqartitaapput. Ilaat inissiisarfinni ammasuniipput aneersinnaallutik, pineqaatissinneqarsimasullu allat inissiisarfimmi matoqqasumi Nuummi 2018-imi ammarneqartussami atugassarititaasunik atuuttunik malinnittussaassallutik. Pineqaatissinneqarsimasut ilaat innuttaasunut akuulerseqqinniarneqarnerminnut atatillugu aneernissaminnut periarfissaqartussaapput allali aneernissaminnut periarfissinneqarnaviannngillat imaluunniit killilimmik immikkulluunniit atugassaqartinneqarlutik taamaallaat aneersinnaallutik. Pineqaatissinneqarsimasut ilaat isertitsiviup avataani atorneerluinermut katsorsartinnissamut peqataasinnaapput allat peqataasinnaanngitsut.

Apeqqummut 1-imut Naalakkersuisut ilangussaq 2-mi akissutaat naapertorlugu ataatsimiititaliamit paasineqarpoq nunatsinni inissiisarfinni inissinneqarsimasunut atorneerluinermut katsorsartinnissamut aningaasanik qulakkeerinninnissamik suliaqartoqartoq.

Siunnersuummi § 29 pillugu siunnersuineq

Siunnersuummi § 29-imut allannguutissatut siunnersuummik saqqummiussisoqarnissaa siunertaralugu ulloq 26. maj 2017-imi Peqqissutsimut Naalakkersuisoq siunnersuinnissamut ataatsimiititaliap aggersarpaa.

Inatsimmi tunngavigineqartussap ilanngunneqarnissaa suli siunertaasoq Siunersuinerimi Peqqissutsimut Naalackersuisup paasissutissiissutigaa, taamaalilluni Kalaallit Nunaanni Pinerluttunik Isumaginnittoqarfiup inissiisarfiisa ataani pineqaatissinneqarsimasunut atorerluinerimik katsorsaanerimut tunngatillugu atugassarititaasut Naalackersuisut aamma Kalaallit Nunaanni Pinerluttunik Isumaginnittoqarfiup akornani isumaqatigiissutigineqarsinnaaniassammat.

Pineqaatissinneqarsimasut nunatsinni inissinneqarsimasut atorerluinerimik katsorsartinnissamut atukkat pillugit Naalackersuisut aamma Kalaallit Nunaanni Pinerluttunik Isumaginnittoqarfiup akornanni isumaqatigiinniartoqarnera ataatsimiititaliamit ilisimaneqarpoq. Tamatumunnga atatillugu Pinerluttunik Isumaginnittoqarfik pineqaatissinneqarsimasunut aamma pisussaaffeqarmat ataatsimiititaliap erseqqissaatigissavaa.

Pineqaatissinneqarsimasut inissinneqarsimanermi nalaani aneersinnaasut inuiaqatigiinnut ilaatinneqarnissaat ataatsimiititaliap kissaatigaa.

Taamaattumik § 29 ima oqaasertalerneqassasoq ataatsimiititaliap siunnersuutigaa:

§ 29. Atornerluinerimik katsorsartinnissamut Innuttaasunut atugassarititaasunik Kalaallit Nunaanni Pinerluttunik Isumaginnittoqarfiup inissiisarfiisa ataanni pineqaatissinneqarsimasut Peqqinnissaqarfiup atorerluinerimik katsorsartinnissamut neqeroorutaanik nalinginnaasunik atuinissaminnut periarfissaqanngitsut pillugit Naalackersuisut aamma Kalaallit Nunaanni Pinerluttunik Isumaginnittoqarfiup akornanni isumaqatigiissuteqartoqassaaq,.

Tamatuma kingunerisaanik siunnersuummi § 29-imut allannguutissatut siunnersuummik Naalackersuisut saqqummiusseqqullugit ataatsimiititaliamit kaammattuutigineqarpoq, ataatsimiititaliallu kissaataa naammassineqarsinnaaqqullugu.

Naalackersuisut aamma Kalaallit Nunaanni Pinerluttunik Isumaginnittoqarfiup akornanni atorerluinerimik katsorsartinnissamut isumaqatigiissutaat pillugu siunissami ilisimatinneqar-tarnissani ataatsimiititaliap kissaatigaa.

Atuuffissaa, inuit pineqartut akeqanngitsumillu atorerluinerimut katsorsaanisamik tunngavik pillugit siunnersuummi aalajangersakkat ataatsimiititaliamit taparserneqarput.

Siunnersuummi § 2, imm. 2-p qulakkeertussaavaa angerlarsimaffeqanngitsut aamma atorerluinerimut katsorsartinnissamik neqeroorfigineqarsinnaanerat. Angerlarsimaffeqanngitsut angerlarsimaffeqanngitsut akornaniittartut akeqanngitsumik

atornerluinermut katsorsartissinnaanermut periarfissanik ilisimatinneqartarnissaat pillugu immikkut iliuuseqaqqullugit kommunit ataatsimiititaliamit kaammattorneqarput.

Atornerluinermik katsorsaaneermut, tassungalu ilanngullugu katsorsaaneersamik neqeroorutitut allattorneqartut siunnersuutillu § 4-ni erseqqinnerusumik itisiliivigineqartut, siunnersuut sammitinneqartoq ataatsimiititaliap maluginiarpa. Naak katsorsaaneermik neqeroorutitut 1-8)-mi allassimasut ilaatinneqarsinnaasut siunnersuummut § 4-mi allassimagaluartoq ataatsimiititaliamit ilimagineqartariaqarpoq neqeroorutitut allassimasut pisariaqartitsineq malillugu atuutilersinneqartarnissaat Naalakkersuisunit qulakkeerneqassasoq.

Atornerluineq pillugu paasisimaqarfimmik Allorfimmik taaneqartartumik pilersitsinissaq ataatsimiititaliap tapersorsorpa. Nunatsinni atornerluineq akiorniarlugu suliniuteqarnermi Paasisimasaqarfik pisariaqartut, qitiusutut ataqatigiissaarisutullu inissisimassaaq. Atornerluinermik katsorsaaneermi misilittakkavut aqqiussuussaasumik ilisimasaqarfialugit katersaatiginissaat nunatsinni amigaatigaarput, matumani ilanngullugu minnerunngitsumik katsorsaariaatsit, utersaartarneq aamma katsorsartereernermi neqeroorutit kiisalu ataatsimut isigalugu atornerluinermut suliniutigut pillugit misilittakkat.

Siunnersuummi § 7 siulersuisullu katitigaanerannut tunngatillugu ikinnerusunik siulersuisoqarnissaa pisariinnerusoq aaqqiussutissatut toqqarneqarsimanngitsoq ataatsimiititaliamit maluginiarneqarpoq. Akerlianilli nunatsinni kommunalbestyrelsit tamarmik ataatsimik toqqaassasut siunnersuutigineqarsimalluni, tassa taakku ilaasortaattassaat siunnessami tallimaassallutik tamatumalu saniatigut Naalakkersuisut ilaasortassanik sisamanik Naalakkersuisoqarfinit sisamanit ukunaneersunit toqqaanissaat siunnersuutigineqarpoq:

- 1) Peqqissutsimut Naalakkersuisoqarfik,
- 2) Ilaqutariinnermut, Naligiissitaanermut, Isumaginninnermut Inatsisinillu Atuutsitsinnermut Naalakkersuisoqarfik,
- 3) Aningaasaqarnermut Naalakkersuisoqarfik aamma
- 4) Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfik.

Siunnessami katillugit qulingiluanik ilaasortaartussami Peqqissutsimut Naalakkersuisoqarfimmiit siulersuisuni ilaasortaatinneqartoq siulittaasuusassasoq siunnersuummi § 7, imm. 3-mi siunnersuutigineqarpoq.

Kommunit ataasiakkaat sinniisuutitaqarnerisa iluaqutigisinnaavaa paasissutissat, ilisimasat misilittakkallu piumasaqaataasut Allorfimmut ingerlatinneqartarnissaasa qulakkeerneqarnissaa inuup ataatsip akisussaaffigilissammagu.

Siunnersuummi § 7-imut Allorfiup siulersuisuisa katitigaanerannut tunngatillugu ataatsimiititaliaq sukumiinerusumik nalilersuereerluni inerniliivoq, siunnersuummi taaneqartut Naalakkersuisoqarfinit innersuunneqartut amerlavallaartut ataatsimiititaliaq isumaqartoq. Siunnersuummi § 7, imm. 2-mi siunnersuutigineqartoq atornagu Allorfimmi siulersuisut allatut katitigaanissaat ataatsimiititaliap kissaatigaa. Siulersuisuni ilaasortat Naalakkersuisoqarfinit innersuunneqartut sisamaniit pingasunut appartinneqassasut ataatsimiititaliaq isumaqarpoq.

Aningaasaqarnermut Naalakkersuisoqarfik Allorfiup siulersuisunut innersuussissanngitsoq ataatsimiititaliamit siunnersuutigineqarpoq.

Naalakkersuisoqarfiit sinneri pingasut siulersuisuni sinniisaat Naalakkersuisoqarfinni aaqquissuussinernik ilisimasaqartariaqarput, matumani ilanngullugu aningaasaqarnikkut ilisimasaqartariaqarlutik. Naalakkersuisut innersuussaat ilisimasanik avitseqateqarsinnaasariaqarput ilisimasanillu ujarlernissamut ilisimasaqartariaqarlutik.

Akerlianilli ataatsimiititaliaq isumaqarpoq atornerluisunik katsorsaanissamik ilisimasaqartumik siulersuisuni ilaasortassamik Naalakkersuisut toqqaanissaat qulakkeerneqartariaqartut.

Tamatuma kingunerisaanik siunnersuummi § 7, imm. 2-mut allanngutissatut siunnersuummik Naalakkersuisut saqqummiussissasut ataatsimiititaliap innersuussutigaa, tassa Aningaasaqarnermut Naalakkersuisoqarfik Allorfiup siulersuisuni ilaasortaaitassaatut innersuunneqartoq peerneqassasoq. Siunnersuummi § 7, imm. 2-mi allanngutissatut siunnersuummi Allorfimmi siulersuisut Naalakkersuisunit toqqarneqartut sisamaasuni minnerpaamik ataaseq atornerluisunik katsorsaanermik misilittagaqarsimanissaa qulakkeerneqassaaq.

Allanngutissatut siunnersuutip ilusilersorneqarnera tunngavigalugu siunnersuutip § 7-ia kingunerisassaat allanngortinneqarsinnaapput.

Siunnersuummi § 7, imm. 2-mi allassimasumut tunngatillugu ilaasortat kommunalbestyrelsinit ataasiakkaanit toqqarneqarsimasut kommunalbestyrelsimut ilaasortaaniisaat piumasaqaataanngitsutut isikkoqartoq ataatsimiititaliap maluginiarpaa. Taamaalilluni kommunini sulisunik imaluunniit inummik ilisimasalimmik misilittagalimmillu, kommunit ataasiakkaat malillugit Allorfimmi siulersuisuni kommunimut sinniisuusussatut piukkunnaateqartutut isigineqartumik kommunit ataasiakkaat toqqaasinnaapput.

Allorfiup ukiumoortumik Naalackersuisunut nalunaarutaat tamanit Inatsisartut ilanngullugit piaartumik takuneqarsinnaasunnigortinneqartarnissaat ataatsimiititaliamit kaammattuutigineqassaaq.

Paasisimasaqarfimmi pisortap illoqarfinnilu Allorfimmi sulisut ilinniagaqarsimanissaannik piumasaqaatitut siunnersuutigineqartut pillugit

Siunnersuummi § 12, imm. 2 Paasisimasaqarfimmi pisortap *masteritut* ilinniagaqarsimanissaannik siunnersuuteqarfiusoq ataatsimiititaliap immikkut oqaluuseraa.

Allorfimmi Paasisimasaqarfimmi pisortap Allorfimmi pisortaassaguni pisariaqartinneqartunik inuttut iliniakkatigullu pinnaasaqarnissaa ataatsimiititaliamit paasilluarneqarsinnaavoq, siunnersuummili § 12, imm. 2 Allorfimmi Paasisimasaqarfimmi pisortap qaffasissumik ilinniagaqarsimanissaannik piumasaqaat qaffasippallaartutut taamaalillunilu ajornerpaamik pisoqassappat inuit piginnaanillit atorfirmut Paasisimasaqarfimmi pisortatut qinnuteqarnissaagaluinut mattunneqaannarsinnaasut ataatsimiititaliaq isumaqarpoq.

Tamatuma malitsigisaannik siunnersuummi § 12, imm. 2-mut allannguutissatut siunnersuummik Naalackersuisut nassiussinissaat ataatsimiititaliamit kaammattuutigineqassaaq, taamaalilluni Paasisimasaqarfimmi pisortap masteritut ilinniagaqarsimanissaa piumasaqaataajunnaarluni.

Ataatsimiititaliap paasinninnera naapertorlugu siunnersuummut allannguutissatut kissaatigineqartoq aningaasaqarnikkut kinguneqaatinik siunnersuummut tunngatillugu immikkut isiginiartarialinnik nassataqassanngilaq.

Allorfik pillugu siunnersuummi aalajangersakkat allat ataatsimiititaliamit tusaatissatut tiguneqarput.

Siunnersuummi § 16-imi pineqartoq inuit atornerluisunut pingaaruteqartut nammineq kajumissuseq naapertorlugu aaqquissuussinerusoq ataatsimiititaliap maluginiarpaq. Atornerluinermut tunngatillugu pitsaaliuilluni suliniutini nunatsinni suliffeqarfinni inuit atornerluisunut pingaarutillit qitiusutut inissisimalersinnaalluarput. Inuit atornerluisunut pingaaruteqartumik inissisimasut misilittagaqarfigineqarnerat pillugu kingusinnerusukkat ilisimatinneqarnissaminut ataatsimiititaliaq qilanaarpoq.

Siunnersuummi § 24-mut, illoqarfinni katsorsaavinni sulisunut tunngatillugu siunnersuummi § 24, imm. 1-imi ilinniagaqarsimanissamik piumasaqaat ataatsimiititaliamit aammaarlugu maluginiarneqarpoq.

Matumani ilinniagaqarsimanissamik piumasaqaat qaffasinaagaasoq piuminaatsutullu ataatsimiititaliamit aamma isumaqarfigineqarpoq. Siunnersuummi § 24, imm. 2-mi saneqqutsinissamut aalajangersagaq ataatsimiititaliamit ilisimaneqarpoq siunnersuummili §

24, imm. 1-mi ilinniagaqarsimanissamik piumasagaatip qasukkarneqarnissaa kaammattuutigeqqissallugu, taamaaliornikkut bacheloritut imaluunniit qaffasinnerusumik ilinniagaqarsimanissaq pingaarnertut malittarisassaajunnaaqullugu.

Tamatuma malitsigisaanik siunnersuummi § 24, imm. 1-imut allannguutissatut siunnersuummik Naalakkersuisut nassiusseqqullugit ataatsimiititaliamit kaammattorneqarput, taamaaliornikkut iloqarfinni atornerluisunut katsorsaavinni sulisut bachilooritut qaffasinnerusumilluunniit ilinniagaqarsimanissaat pingaarnertut piumasagaataajunnaaqullugu.

Ataatsimiititaliap paasinninnera naapertorlugu siunnersuummut allannguutissatut kissaatigineqartoq aningaasaqarnikkut kinguneqaatinik siunnersuummut tunngatillugu immikkut isiginiartarialinnik nassataqassanngilaq.

Illoqarfinni atornerluinermit katsorsaavinni sulisut inuttut ilinniagaqassutsikkullu pisariaqartunik piginnaaneqarnissaannik kissaateqarneq ataatsimiititaliamit paasilluarneqarsinnaavoq. Piginnaasat tamakku pigineqarput, ilinniakkatigulli qaffasissumik inissisimanissaq aallaavittut piumasarineqassappat amerlasuut qaangiinnarneqartutut misigisimassapput amerlasuullu qinnuteqarnissamut mattunneqassallutik.

Siunnersuutip ulloq 1. august 2017-imi atuutilernissaa isumatusaarnerusooq ataatsimiititaliaq isumaqarpoq.

Siunnersuutip aningaasatigut kingunerisassai

Nunatsinni atornerluinerup kingunerisaanik aningaasarsianit annaasat kiisalu pinerlunniarnerit ukiumut katillugit 250 aamma 316 mio. kr.-it akornanni peqqinnissaqarfimmuut isumaginnittoqarfimmullu toqqaannartumik aningaasartuutaasartut “Kalaallit Nunaanni atornerluinermit aningaasartuutit” pillugit nassuiaammi 2015-imeersumi allassimasooq ataatsimiititaliamit siusinnerusukku maluginiarneqarpoq. Atornerluinerup kingunerluutillu nassatarisaannik toqqaannangikkaluartumik aningaasartuutit kisitsisilerneqarsinnaanngitsut qularnanngilluinnartumilli annertuut matumani ilanngunneqassapput.

Atornerluinermit katsorsaanerup pingaartillugu iliuuseqarfigineqarnera siumut isigisumik pisortanut sipaaruteqarnermik kinguneqarumaartoq naatsorsuutigineqarpoq.

Taama oqariartuuteqarneq eqqutissasoq ataatsimiititaliaq neriuppoq, piviusunngortinneqarnissaanullu suliniutissat ataatsimiititaliamit tapersorneqarlutik.

Tassunga atatillugu inuiaqatigiinni atornerluinerup annertuneranut pissutaasut unitsinniarlugit siunnerfilimmik sulinissaq aammalu assersuutigalugu eqimattanut inunnullu imigassamik

aalakoornartulimmik ajornartorsiutitalimmik atuisunut atueriaaseqartunullu sunniuteqartumik imigassaq pillugu politikkeqarnissaq pingaaruteqarpoq.

Siunnersuutip piviusunnngortinneqarnerata aningaasatigut kingunerisassai siunnersuummut nalinginnaasumik nassuiaatini peqqissaartumik allaaserineqarsimapput. Atornerluinermut katsorsaanissamut aningaassat atornerqartussat konto pingaarnermi ataatsimi ataatsimoortinneqartut oqaatigineqarpoq. 2017-imi Aningaasanut Inatsisissap suliarineqarneranut atatillugu atornerluinermut katsorsaanermut aningaasaliissutigineqartut 5,9 mio. kr.-inik ilaqinneeqrput taamaaliornikkut 2017-imut Aningaasanut Inatsimmi aningaasat konto pingaarnermi 34.11.08-miittut katillugit 37 mio. kr.-it sinnilaarlugit amerlassuseqalerlutik, ukiunilu missingersuusiorfiusuni 35,2, 32,3 aamma 33,7 mio. kr.-iussallutik.

Siunnersuutip aningaasatigut kingunerisassaatur saqqummiunneqartut ataatsimiititaliamit ataatsimut isigalugu tusaatissatut tiguneqarput.

Ataatsimiititaliap inassuteqaataa

Tamanna tunngavigalugu ataatsimiititaliap kaammattuutaanut siuliani allassimasunut naapertuuttumik Naalakkersuisut allannguutissatut siunnersuummik saqqummiussererpata siunnersuut Inatsisartunit akuerineqassasoq ataatsimiititaliamit isumaqatigiittumit inassutigineqarpoq.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Martha Lund Olsen
Siulittaasoq

Mala Høy Kuko

Jess Svane

Laura Tàunâjik

Debora Kleist

Mimi Karlsen

Kelly Berthelsen